

Instrución 1/2022, da Axencia Galega de Innovación para iniciar o procedemento de avaliación do rendemento da fase de estadía do persoal investigador contratado ao abeiro do programa de apoio á etapa de formación posdoutoral, modalidade A, do ano 2019.

A Orde do 28 de maio de 2019 (DOG núm. 111, do 13 de xuño), conxunta da Consellería de Educación, Universidade e Formación Profesional e da Consellería de Economía, Emprego e Industria, modificada pola Orde do 30 de setembro de 2019 (DOG núm. 201, do 22 de outubro de 2019) pola que se establecen as bases para a concesión, en réxime de concorrencia competitiva, das axudas de apoio á etapa de formación posdoutoral nas universidades do Sistema universitario de Galicia, nos organismos públicos de investigación de Galicia e noutras entidades do Sistema galego de I+D+i, recolle no artigo 6 do anexo I o procedemento de avaliación do rendemento para a fase de estadía das persoas contratadas con cargo á modalidade A deste programa.

De acordo con este artigo, un mes antes da finalización do contrato as entidades beneficiarias terán que remitirlle á Axencia Galega de Innovación un informe, xunto cunha memoria asinada pola persoa contratada e pola persoa responsable ou coordinadora do grupo, sobre o grao de cumprimento do plan de estadías. Este informe deberá vir acompañado dos certificados de ter realizado a estadía emitidos polos centros receptores.

Os contratos en vigor correspondentes a estas axudas están no ámbito de aplicación da Orde do 19 de xuño de 2020 (DOG número 128, do 30 de xuño), polo que a súa duración se ampliou 6 meses como consecuencia da situación creada pola pandemia do COVID-19, e da Instrución 3/2020 da Secretaría Xeral de Universidades e da Axencia Galega de Innovación, en relación coas estadías das convocatorias de axudas posdoutorais dos anos 2018 e 2019 como consecuencia da situación creada pola evolución da pandemia do COVID-19.

En consecuencia, a directora da Axencia Galega de Innovación, no uso das competencias que ten atribuídas, dita a seguinte instrución:

1. Iniciar o procedemento que permita a avaliación das persoas investigadoras contratadas no Programa de axudas de apoio á etapa inicial de formación posdoutoral, modalidade A, da convocatoria do ano 2019 que se atopan a piques de rematar o seu período de estadía no estranxeiro, de acordo co procedemento establecido no artigo 6 do anexo I da Orde do 28 de maio de 2019.



2. Para tal fin, as entidades beneficiarias deberán remitir, no prazo de dez días dende o día seguinte ao da publicación desta instrución, un informe acompañado dunha memoria asinada pola persoa contratada e pola persoa responsable ou coordinadora do grupo de investigación, sobre o grao de cumprimento do plan de estadias, no que se indicarán os períodos de estadias efectivamente cumpridos especificando, no seu caso, as modificacións producidas e a súa causa con respecto ao plan de estadias presentado coa solicitude. Complementariamente, e para verificar o cumprimento do período mínimo de 21 meses esixido na fase de estadia, as entidades beneficiarias deberán remitir un certificado emitido polo centro ou centros receptores, no que se indique o período de tempo en que a persoa contratada permaneceu neles.

Aquelas persoas que finalicen o seu contrato con posterioridade ao 15 de abril de 2022 terán que achegar a documentación no prazo de 20 días hábiles anteriores á súa finalización.

3. Co obxecto de coñecer o rendemento científico acadado nesta fase, o informe da entidade beneficiaria e a memoria que o acompaña deberán describir o traballo realizado por cada unha das persoas contratadas así como o grao de adecuación das actividades desenvolvidas ao seu plan de traballo previsto para ese período. No caso de que se produciran modificacións sobre as previsións iniciais deberanse motivar e explicar a súa incidencia no proxecto presentado. A documentación presentarse en formato libre e a memoria deberá ter unha extensión de entre 2.500 e 4.000 palabras.

4. O informe, a memoria e a documentación complementaria serán avaliados pola Axencia Galega de Innovación, que poderá contar co asesoramento de expertos externos, e será preciso obter unha avaliación positiva e realizar un mínimo de 21 meses de estadia nesta fase para acceder ao contrato na fase de retorno.

Santiago de Compostela, na data da sinatura dixital

A directora da Axencia Galega de Innovación

Patricia Argerey Vilar

